


KA SOCIAL AUDIT BAD KI HOK U PAIDBAH HAPOH KA MGNREGS



BA LA PYNMIH
DA KA
STATE INSTITUTE OF RURAL DEVELOPMENT
MEGHALAYA



1. KI KYNTIEN AUDIT KA MUT AIU?

Ka kyntien Audit ka mut ka jingpeit bniah ia ki rukom buh jingkhieñ jingdiah bad ki rukom pynlut pynsep. Kadei ka jing pule bniah ia ka rukom rung bad ka rukom mih pisa bad ban peit la ka jingpynlut ka long ne em kaba beit kaba ryntih katkum ki kyndon ba la buh. Ka Audit ka donkam ha man ki kam kiba iadei bad ka kam pisa pilain namar ka iathuh shai iangi kumno la ioh pdiang bad kumno lapynlut bad khnang ba ngin lah ban pynbeit ia ki jingbakla lada don. Ki juh leh ia ka Audit ha ki kam business, kam sorkar, ki kam seng bhalang bad kiwei kiwei. Ka jing audit ia ki jinglut jingsep jongngi ka iarap iangi bad hikai iangi ban long kiba adkar bad nang ban pyniaid ia ki kam pisa pilaiñ jongngi.

Ka rukom audit ka la nang iar ka jingmut kat ba nang mih ki sngi bad mynta la don ruh sa ki audit ba peit ym tang ia ki kam ba iadei bad ka pisa pilaiñ hynrei ban peit ruh ia ki rukom pyniaid ia ki kam, ki aiñ bad kiwei kiwei da kaba pynrung shuh ki kyntien ban kham pyniar ia ka jingmut jong ka kyntien audit. Kumta ngi don lai jait ki audit bad kita ki long ka government audit lane ka financial audit, ka people's audit lane ka audit ba la leh da ki paidbah bad ka social audit. Ha kane ka kot lyngkdop yn batai shaphang ka social audit.

2. KAEI KA SOCIAL AUDIT?

Kane ka dei ka rukom audit ha kaba ki paidbah ki don ka hok ban jurip ia ki jingkhieñ jingdiah bad ki rukom pyntrei bad pyniaid kam ia kano kano ka skhim, policy lane aiñ ryngkat bad ka sorkar. Ka social audit kam thmu ban it eh tang ia ki jingbakla hynrei ka thmu ban wad ia ka jingshisha, kaba mut ba ba ngim it tang ia ki bynta ban ioh wohnia lane kdew ia ki jingbakla ki nongpyniaid kam hynrei kaba kongsan eh ha ka social audit ka long ban kham pynbha shuh shuh ia ki rukom trei bad jingpyniaid ia kano kano ka jingtrei. Ha ka social audit ki nongkitkam ki hap ban ai jingkhieñ jingdiah bad pynshai paidbah ia ki kam ba la trei bad kumno la pyntrei ia ki kam. Halor kine ki jingpynshai bad jingai jingkhieñ ki paidbah ki lah ban kylli jingkylli bad ai jingmut halor kumno yn lah ban kham pynbha ia ki jingtrei bad kumno yn kham long kiba adkar ha ka rukom pynlut ia ka pisa ka tyngka. Lyngba ka social audit ngi lah ruh ban tehakam pyrshah ia kito kiba la pynkhieñ ia ki kyndon aiñ bad kyndon trei kam.

Ki jingmyntoi na kane ka Social Audit ka long ba

- (a) Ngi lah ban sngewthuh ia ka jingangnud jong ki paidbah.
- (b) Ngi lah ban sngewthuh halor kumno ka skhim lane ka kam ka la wanrah ia ka jingmyntoi sha u paidbah.
- (c) Ngi ailad ia u paidbah ban jurip bad ban thew ban woh ia ka rukom pyntrei.
- (d) Ka sorkar bad ki nongkitkam ruh ka hap ban shim khia ia ki jingshem lyngba ka social audit bad pynbeit ia ki jingbakla bad jingduna.

3. KA SOCIAL AUDIT HA KA MGNREGA BAD MGNREGS:

Da ka jingmih jong ka aiñ Mahatma Gandhi National Rural Employment Guarantee Act (MGNREGA) bad ka jingpyntrei ia ka Mahatma Gandhi National Rural Employment Scheme Meghalaya, ka jingpynlong ia ka Social Audit ka la long ka bynta ba kongsan jong ka skhim katkum ka Section 17 jong ka MGNREG Act bad halor kane ka Section ka Sorkar India ka la thaw ia ki kyndon ban pyniaid ia ka Social Audit katkum ka notification MGNREG Audit of Schemes Rules 2011.

Hynrei shuwa ban ngin ia kren kham bniah shaphang ka jing iadei jong ka Social Audit bad ka MGNREGS la sngewdei ban tip bniah shuwa shaphang ka Social Audit nalar katei ka Jingbatai haneng.

4. BALEI DONKAM IA KA SOCIAL AUDIT?

Ngi donkam ia ka Social Audit namar ban pynkhlaifñ shuh shuh ia ka rukom synshar bad ban pynbha ia ki rukom trei kam naka bynta ka jingmyntoi jong u paidbah ba bun balang.

Ka social audit ka iarap ban wanlam ia kine ki mat bala kdew harum:

- (i) Transparency lane ka jingshai halor ka rukom pyntrei ia ki kam khnang ba u paidbah u don ka jinghun, jingsngewthuh bad ka jingsngew longtraï halor ki kam bala pyntrei.
- (ii) Accountability lane ka jingai jingkhieñ sha u paidbah da ki nong pyniaid bad nongkit kam ba la jied.
- (iii) Participation lane ka jingiashim bynta jong u paidbah ha ka ban kylli bad tohkit ia ki rukom trei bad rukom pyniaid kam bad

ban ai jingmut shuh shuh halor kumno ban kham pynbha ia ki kam ha ka rukom ban kham myntoi u paidbah.

- (iv) Grievance Redress lane ban weng ia ki jingeh kiba ki paidbah ki shem ha ka jingpyntrei ia ka skhim bad ban pynkhuid bad pynbeit ia kino kino ki jingujor.

Ka social audit ka iarap ruh ia ki briew ban kham ioh jingshai halor ki hok jong ki kumba la pynkham ti da ka aifi bad kumno ban pyniaid beit iaaid ryntih ia ki jing trei khnang ba kan ai ka jingmyntoi ba pura.

5. KUMNO YN LEH SOCIAL AUDIT?

Kat kum ka jingbthah jong ka aifi bad ki kyndon trei kam donkam ban leh ia ka social audit la kumno kumno ar sien shi snem.

Ki mat harum ki long ki rukom ban bud ha ka ban leh ia ka, 'social audit'.

- (a) Ka District bad ka Block ryngkat ki VEC kin pynkhreh ia ka Social Audit Calendar ban kdew ia ka por bad ki tarik ban leh ka social ha man ki shnong.
- (b) Ia ki tarik ba la kdew ha ka social audit calendar donkam ban pynbna da u BDO lane u Programme Officer la kumno kumno shibnai shuwa ban long ka social audit.
- (c) Khnang ban lah ban leh ia ka social audit, donkam ban seng ia ka Social Audit Committee hapoh ka shnong ka ban kynthup ia ki dkhot jong ka VMC, ki longing ba don job card bad kiba la trei ha ki jingtrei, ki longkmie bad kito kiba tip bha shaphang ka skhim MGNREGA. Ka Social Audit Committee kam dei ban palat ia ki 20 ngut ki dkhot bad la kumno kumno 30% ki dei ban long ki kynthei.
- (d) Ki nongpyniaid kam naduh kiba trei ha ka ophis u BDO kiba bat ia ki kot ki sla ba donkam haduh ki nongkit kam ka VEC kin hap ban pynkhreh ia ki kot ki sla la kumno kumno 15 sngi shuwa ban long ka social audit khnang ba ki dkhot ba la jied ban leh ia ka audit kin lah ban jurip bad peit bniah ia ki bad ban ai ia ka report halor jong ki.
- (e) Ha kaba sdang, dei ban lum ia baroh ki jingkhieñ jingdiah bad ki kot ki sla bad donkam ka jingtip bniah jong ki kam ha ka ba yn leh ia ka Audit.

- (f) Hadien ba la jurip bniah ia ki kot ki sla, dei ban thoh ia ka report halor ki jingshem baroh bad ban kdew ia kino kino ki jingduna ha kab buh bad pynbiang ia ki kot ki sla. Shuh shuh ka Social Audit Committee ka dei ruh ban jurip ruh ia ki jaka ba la pyntrei ia ki kam bad ban peit ia ka quality jong ka jingtrei. Halor kane ruh ki donkam ban thoh ia ka report ba bniah katkum ka jingshem jong ki.
- (g) Ha ka sngi bala pynbeit ia ka social audit donkam ban pule ia ka report hakhmat uyba bun balang ryngkat ka jingiadon lang ki nong kit kam na ka VEC bad ka Block bad District khngang ba lada don kano kano ka jingkylli ne jingtohkut kin la ban ai ka jingpynshai bad ban lah ban pynbeit ia ki jingdkoh ha ka rukom trei bad pyniaid kam.
- (h) Hadien ba la pynsngew paidbah ia ki report bad bala shim ia ki rai bad la lah ban pynbeit ia ki jingduna bad jingujor baroh dei ban pynkhreh biang sa kawei ka report bad submit sha ka ophis u BDO bad halor kane ka report u BDO un khot pat ia ka public hearing ban pynbeit ia kiei kiei kiba ym shim la lah ban pynbeit. Ha kane ka public hearing dei ban ia leh ban pynbeit la kumno kumno 80% na ki jingdkoh kiba la shem ha ka jingpyntrei ia ka skhim ha ka jing ia don ryngkat u Deputy Commissioner (DC) lane u nongmihkhmat na ka bynta jong u, u BDO bad kiwei de ki shakri sorkar kiba don bynta ha ka jingpyntrei ia ka MGNREGA bad ki nongkit kam ka VEC. Dei ban pyrshang katba lah ban pyntreikna ba kita kiba ioh jingmyntoi na ka scheme ne program ba ki wan sha khmat ban phla pynshisha ha khmat ki briew baroh, ha ka jingialang khngang ba ia ka MGNREGS ngin nang lah ban pyntrei kham bha shuh shuh ha ka rukom bakhuid basuba.
- (I) Ia kino kino ki jingdkoh ha ka rukom pyntrei kiba ym shim la lah ban pynbeit ha ka public hearing dei ban rah pat sha ki bor ba kham halor ban leh ia kaba donkam.
- (J) Ia ki rai jong ka public hearing donkam ban thoh bniah bha ia ki da uno uno u briew ba la jied u bym dei ruh u ba don bynta hapoh ka skhim bad ban pyllait paidbah ia ki lyngba ki lad bapher bapher bad khamtam hapoh ka MIS.

KI HOK U PAIDBAH HAPOH KA MGNREGS:

1. Ban ïoh kam bylla sngi 100 sngi ha ka shisnem (snem trei kam sorkar)
2. Yn pyntrei ïa kane ka skhim ha ki shnong nongkyndong ba la kynthup ha ka Khanasamari (Census) 2001. Baroh ki paid nongshong shnong ha kine ki shnong kiba hap hapoh ka District ba la pyntrei kam ïa kane ka aiñ/skhim kin ïoh bynta.
3. Man ka longïng ka don ka hok ban register hapoh kane ka aiñ/skhim
4. Ka longïng ba la dep register ka dei ban ïoh ka job card.
5. Man ka VEC kan jied hi ïa ki kam katkum ka jingbthah jong ka aiñ.
6. ïa ki kam ba la jied bad pynskhem da ka VEC ym lah ban pynkylla lane weng ïa ki dano dano ruh lait na ka VEC hi.
7. U ne ka dkhot jong ka longïng ba la register ka lah ban apply (thep dorkhast) shimet ne lyngba ka kynhun ban ïoh kam hapoh kane ka skhim
8. Yn sdang kam thymmai katkum ki kam ba la jied tang lada don 10 ngut ki nongdawa kam
9. ïa ka bainong sngi yn siew katkum ki kyndon jong ka Minimum Wages Act 1948 lane kum ba la bthah da ka Sorkar Kmie na ka por sha ka por.
10. Lada ki nongioh kam ki trei ha ka jaka ba palat ïa ka 5 km na la shnong kin ïoh tam sa 10 na ka shispah jong ka dor jong ka bainong
11. Lada ym lah ban ai kam hapoh 15 sngi na ka sngi ba thep dorkhast ne na ka sngi ba dawa ïa ka kam ka sorkar kan hap siew 25 na ka shispah na ka dor jong ka bainong sngi kum ka unemployment allowance
12. Lada hadien 30 sngi ruh ym lah ban ai kam, yn siew unemployment allowance ha ka dor 50 na ka shispah jong ka dor bainong sngi
13. Ha man la ka jaka trei kam dei ban don ka jingpynbiang ïa ka dara, umbam umdiñ bad ka jaka ri khyllung lada don palat 5 ngut ki khyllung kiba hapoh 6 snem ba la ïalam da ki kmie
14. Yn kitkhlieh da ka VEC ban pynlong ïa ka Social Audit lane ka jingjurip bñiah ïa ka rukom pyntrei ïa ki kam baroh bala pyntrei ha shnong hapoh kane ka skhim.

